

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 7
Abril 7, 2008
www.philippinerevolution.net

Editorial

Pasabton ang rehimeng Arroyo sa sobra nga pag-antos sang pumuluyo

Salabton sang rehimeng Arroyo ang wala kapares nga pag-antos subong sang pumuluyong Pilipino. Ang pagtimbuok sang mga presyo sang bugas, mga produkto nga langis kag iban pa nga basehang kinahanglanon nakaugat sa kontra-pumuluyo nga polisiya pang-ekonomya ni Arroyo nga masobra isa ka dekada na nagabunal sa pumuluyo.

Isa nga nagaindakal nga bulkan ang malapad nga kaakig sang pumuluyo. Ang grabe nila nga pagkawadon samtang nagapakabusog ang mga dalagku nga bukrata-kapitalista nagapabukal sa ila kaakig kag nagatulod sa ila nga pasingkion pa gid ang paghimakas para patalsikon si Arroyo.

Ila pasabton si Gloria Arroyo sa tanan nga ginabatas nga kabudlayan. Ginasukot nila siya sa pagtulod sadtong 1998 sang General Agreement on Tariffs and Trade (GATT), pagpatuman sang liberalisasyon sang ekonomya kag lubos nga pagpaidalum sang Pilipinas sa imperyalistang globalisasyon. Sa idalum sang GATT, ginbwelo sang magkasunod nga mga rehimen ang li-

beralisasyon sa agrikultura.

Ang liberalisasyon sa agrikultura, sa partikular, nagresulta sa pagdula ukon pagbuhin sang mga subsidyo sa mga mangunguma kag anupaman nga ginagmay nga suporta sang gubyerno sa agrikultura. Ginbukas sini ang pungsod sa wala kutod nga importasyon sang mga produktong agrikultural.

Ang pagdagsa sang bugas, mais, karne nga baka, baboy kag manok kag iban pa nga kapares nga produkto halin sa iban nga pungsod amo ang desaysibo nga nagkuga sa lokal nga produksyon kag sa ikasarang sang Pilipinas nga magtindog sa kaugalingon sa halambalanon sang pagkaon. Sa idalum man sang globalisasyon gintulod ang malaparan nga pagbaylo-gamit sang mga dutang agrikultural nga ginsaylo halin sa humay kag mais pakadto sa mga *cash crop* nga pang-eksport.

Ang pro-imperyalista kag kontra-pumuluyo nga GATT ang pinakadaku nga disgrasya nga nag-igo sa mga mangunguma nga Pilipino. Labi pa sa kahalitan sang pinakamabaskog nga bagyo ang pagkaguba sang




***Mga tampok
sa isyu nga ini...***

**Malala nga krisis sa
bugas** PAHINA 2

**Korapsyon sa programa
sa babuyan** PAHINA 4

**Mga kadalag-an sg BHB
sa Mindanao** PAHINA 6



lokal nga agrikultura. Halin sa taga-eksport sang bugas, nangin palasalig ang Pilipinas sa importasyon tubtub sa nangin pinakadaku nga taga-angkat ini sang bugas sa Asia.

Mas malaut pa, sa pihak sang pagtinambak sa pungsod sang tonelada kag tonelada nga bugas, mais kag iban pa nga pa nga lamigas halin sa iban nga pungsod padayon gihapon ang pagtimbuok

sang presyo sang mga basehan nga pagkaon sini. Ini bangud sa manipulasyon sang suplay kag presyo sang mga mapanghimulos nga elemento nga masami kahimbon sang Malacañang.

Sa pihak sang lapnagon nga pag-antos ginalansang gihapon sa pinakamanubo nga lebel ang suhol kag sweldo sang mga mamumugon kag empleyado.

Ang pagsunud-sunod sang rehimeng Arroyo sa mga dumuluong kag ang wala sang kabusugan nga pangpanawat sini sa kabang-manggad amo ang ugat sang madalum nga krisis sa pangabuhian kag masingki nga pag-

antos sa bug-os nga pungsod. Wala na sang iban nga mahimo ang pumuluyo kundi nga pagtalsikon ang mahakab, mapintas kag reaksyunaryong papet nga rehimeng Arroyo.

Sa madugayan, solo sa pagpu-kan sang bug-os nga sistema nga nagbun-ag sang amo nga mga rehimen mapat-ud sang pumuluyo ang kahilwayan sa gutom kag kalisdanan. **AB**

Malala nga krisis sa bugas

Nagakadasma subong ang rehimeng Arroyo agud tapnaon ang kinagamo kag disgusto sang pumuluyo nga ginatuga sang nagatimbuok nga presyo sang bugas. Isa ini ka isyu nga nagadiretso sa nagakalam ng suluksulok sang pumuluyo, nagapalala sa ila kaglutmon kag kalisdanan kag nagatulod sa ila nga sundon ang dalan sang pagbato.

Sa tuyo nga lubaron ang problema sa suplay, ginmandu ni Arroyo ang importasyon sang 1.5 milyon nga tonelada sang bugas halin sa Thailand kag Vietnam. Nagpalapta man siya sang mga tindahan nga ginadumalahan sang mga suldado sang AFP kon sa diin nagabaligya sang rasyon nga bugas. Agud makapahamot, nanawagan siya sa National Food Authority (NFA) nga pasakaan ang presyo sang palay nga ginabakal sini sa mga mangunguma halin P12 pakadto P17. Ginapagwa man niya nga daku ang pondo nga ginatalana sang guberno bilang suporta sa agrikultura.

Ang tanan nga ini lunsay mga pangtakup-buho nga solusyon kag desperado nga tikang nga mapanipilang. Madumduman nga sadtong Pebrero lamang nagpanghugas pa ang rehimen bahin sa nagahana nga kakulangan sang suplay sang pagkaon sa bilog nga kalibutan. Nagpabugal pa ini sadtong una nga simana sang Marso nga wala sang krisis sa bugas ang Pilipinas kag tubtub subong ginahimutig sini nga magakulang ang suplay sini.

Pat-ud gid nga igabulsa lamang nanday Arroyo kag sang iya mga tinawo ang P43.7 bilyon nga ayuda sa pagkaon, pareho sa natabo sa tuman kadamu na nga iban pang programa sa agrikultura. Pareho sang *fertilizer scam* sadto kag sang



Tuig XXXIX No. 7 Abril 7, 2008

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ika-uswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial: Pasabton ang rehimeng Arroyo sa pag-antos sg pumuluyo **1**

Mabaskog nga krisis sg bugas **2**

Nagatimbok ang presyo sg pagkaon **4**

Korapsyon sa programa nga babuyan **4**

Mga kadalag-an sg BHB sa Mindanao **6**

Pagpanghalit sg estado: Iligal nga pagpang-aaresto, pagpang-ipit **7**

Neri, ginapaboran sg Korte Suprema **8**

Balita **9**

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas



swine scam subong, wala sang maathag nga alagyan ang pondo nga ini kag wala man sang mekanismo para sa husto nga pagpanagtag kag pagkwenta para diri.

Mabaskog nga ginakundenar sang mga organisasyon sang mangunguma, progresibong organisasyon kag malapad nga seksyon sang pumuluyo ang mga katuntuhan ni Arroyo. Siling nila, wala na siya sang ginahimo kundi magwakal kag maggastos sang minilyun-milyon para sa mga padihot nga wala sang katuyuan kundi ibida ang kaugalingon.

Sa kamatuoran, madugay na nga ginapakigbato sang mga mangunguma ang mga tikang kag programa para pataason ang produktibidad sa agrikultura kag pabaskugon ang pagsalig sa kaugalingon sa halambalanon sang pagkaon.

Lakip sa mga ginapakigbato sang mga mangunguma amo ang masunod:

1) Pagpatuman sang tunay nga reporma sa duta. Puno kag punta sang kaimulon sa kaumhan kag pagkaatrasado sang sektor sang agrikultura ang monopolyong kontrol sang mga agalon nga mayduta sa minilyun-milyon nga ektaryang duta nga ulumhan. Dapat ibasura ang paltik nga Comprehensive Agrarian Reform Program nga naputos sang anomalya kag mga palusot para sa mga agalon nga

mayduta. Itib-ong ang kinamatarung sang mga mangunguma sa mga duta nga ila ginatalauma kag hatagan sila sang bastante nga suporta para himuon nga produktibo kag mapauswag ang mga ini.

2) Pagbasura sa Agriculture and Fisheries Modernization Act (AFMA) kag pag-untat sa liberalisasyon sang agrikultura. Ang kakulangan sa lokal nga produksyon amo ang isa sa mga pinakadaku nga kabangdanan sang subong nga kakulangan sa suplay sang bugas kag pagsalig sang pungsod sa importasyon. Bilang pinakadaku nga importer sang bugas sa Asia, daku ang epekto sa pungsod sang kakulangan ang suplay sa bugas kag nagasinaka nga presyo sini sa pangkalibutanon nga merkado. Amo man, ang liberalisasyon sang importasyon sang mga produktong agrikultural nagaresulta sa pagkabangkarote sang mga lokal nga mangunguma, lakip ang mga nagatanum sang humay kag mais.

3) Pag-untat sang land-use kag crop conversion. Ginaako pati sang rehimen nga isa sa pinakadaku nga paktor sa pagtibusok sang ikasarang sang pungsod nga magprodusar sang kaugalingon nga suplay sang palay kag iban pang

pagkaon amo ang pagbaylo-gamit sang mga duta nga agrikultural. Resulta ini sang kadalukon sa ganansya sang papet nga rehimen. Suno sa estadistika sang Bureau of Agricultural Statistics, nagnubo halin 10 milyon pakadto 9.7 milyon nga ektaryas ang mga duta nga ginatalauma. Tuig-tuig, nagakitid ang duta nga ginatamnan sang mga produktong agrikultural. Sadtong mga tuig 2004-2005 halimbawa, nabuhinan sang 56,200 ektaryas ukon 1.4% ang mga kadutaan nga ginatamnan sang mga produktong agrikultural. Ang mga kadutaan nga ginatamnan sang palay nagnubo halin 4.13 milyon sadtong 2004 pakadto 4.07 milyon nga ektaryas sadtong 2005.

4) Pagpataas sa farmgate price sang palay kag iban pa nga produktong agrikultural sa lebel nga indi magnubo sa 25%. Ginapanugyan man sang Kilusang Magbubukid ng Pilipinas nga ilan sang ang presyo sang komersyal nga bugas sa P25/kilo kag P18.75 para sa bugas nga ginapanagtag sang NFA. Sa sini mahatagan sang husto nga kabayaran ang mga mangunguma samtang ginaamlihan ang interes sang mga konsu-
midor.

AB

Protesta batuk sa pagtaas sang presyo sang pagkaon

Naglunsar sang hublag protesta ang mga mamumugon, imol sang syudad sa pagpanguna sang Bagong Alyansang Makabayan kag Kadamay sa Trabaho Market sa Sampaloc, Maynila sining Abril 2. Gamit ang bitbit nila nga mga kalaha kag kaldero, naggahod sila agud pamatukan ang pagtimbuok sang presyo sang bugas kag pagkaon.

Pagkagab-i, naglunsar sila sang dululungan nga *noise barrage* sa Taguig, Parañaque, Pasay, Caloocan kag iban pa nga syudad sa Metro Manila. Ginalauman nga mas madamu pa nga kapareho nga aksyong protesta ang igalunsar sa mga maabot nga simana sa atubang sang nagapadayon nga pagtaas sang presyo sang mga ordinaryong balaligyaon.

Sa isa ka sarbey sang Pulse Asia halin Pebrero 21-Marso 8, naglab-ot sa 66% ukon duha sa kada tatlong Pilipino ang nagpahayag nga mas mabudlay ang ila pangabuhi sa subong kumparar sadtong 2005.


AB

Nagatimbuok ang presyo sang bugas kag iban pa nga pagkaon

Tampok katama ang pagtimbuok sang presyo sang bugas sining nagtaliwan nga simana. Halin P25 kada kilo, nagaabot na ini subong sa P32-38/kilo kag P40/kilo sa pila ka lugar sa Quezon. May nagataya nga maabot pa ini sa P50/kilo sa mga masunod nga bulan.

Nagakaramaal ang rehimeng Arroyo sa pagbalibad nga kulang ang suplay sang bugas. Pero suno mismo sa kaugalingon sini nga mga dokumento, maubos na ang suplay sang bugas sang pungsod paglabot sang Hunyo. Nag-istrikto na ang mga ginaangkatan sini nga mga pungsod, pareho sang Vietnam, Thailand kag Pakistan. Sa atubang sini, napilitan na ang rehimen nga mangutang sa US sang 100,000 metriko tonelada sang bugas para sa kinahanglanon sang pumuluyo halin Mayo 15 tubtub Agosto 15.

Ginahimutig sang mga tikang nga ini sang rehimen ang nau-na sini nga ginasing nga wala sang kakulangan sang bugas. Makahalam-ot man ang panugyan ni DA Secretary Arthur Yap sa mga tag-iya sang restawran nga tunga sa tasa nga kan-on na lamang ang iserbi sa mga kostumer.



Nagpadihut pa ini subong sang pagbaligya sang tig-isa ka kilo nga bugas.

Wala man pulos ang mandu sang DA sa NFA nga pataasan ang presyo sang komersyal nga presyo sang humay. Luwas sa tapos na ang ani subong nga bulan, gamay lamang ang ginabakal sang ahensya halin sa mga mangunguma. Ginako ni NFA Administrator Jessuf Navarro nga isa ka porsyento na lamang sang lokal nga produksyon sang palay ang ginabakal sang ahensya sining nagligad nga duha ka tuig.

Samtang, nagasinaka man ang presyo sang mais halin sa abereyds nga P6/kilo pakadto sa P17-18. Ang ordinaryong mais ginabaligya na sa P23 kada kilo kag ang premium nga klase P25 kada kilo. Ang isa ka sako (50 kilo) nagabili na sang P960-967.50.

Amo man, nagalab-ot

na sa P200/kilo ang presyo sang karne nga baboy subong nga bulan, suno sa National Federation of Hog Farmers. Nagtaas man ang presyo sang arina, gatas kag isda. **AB**

Kulang ang lokal nga produksyon sang palay

HALIN nga nagpaidalum ang Pilipinas sa imperyalistang globalisasyon, padayon nga nagasalig na lamang ang pungsod sa importasyon sang bugas kag iban pa nga produktong agrikultural. Halin 722,000 tonelada sadtong 1997, naglab-ot ang importasyon sang bugas sa 1.7 milyon nga tonelada sadtong 2006.

Halos wala nagadaku ang produksyon agrikultural. Halin sa 1.4% nga pagdaku sadtong 1990-1995, nagtibusok ini sa 0.6% sadtong 1996-2000.

Halin sa taga-eksport sang mga produktong agrikultural sadtong dekada 1970 kag 1980, nangin taga-import ang Pilipinas halin dekada 1990. Halin \$0.257 bilyon sadtong 1991-1994, ang depisit sa negosyo agrikultural sang Pilipinas naglab-ot sa \$3.347 bilyon sadtong 1995-1998.

Subong nga tuig kinahanglan na nga mag-angkat ang pungsod sang duha ka milyong tonelada nga bugas agud mapun-an ang kakulangan sa lokal nga produksyon. **AB**

Korapsyon sa programa sa pagsuporta sa mga babuyan, ginbuyagyag

Isa na naman ka daku nga kaso sang korapsyon sang rehimeng Arroyo ang naglupok sa publiko sining Abril. Nagalab-ot sa P1.1 bilyon sang P5 bilyong pondo sang "swine program" ang nadula kag ginapatihan nga gingamit sa eleksyon sadtong 2004. Ginbuyagyag ini ni Atty. Harry Roque sang University of the Philippines (UP) College of Law.

Suno sa report sang Commission on Audit (COA) sadtong 2005, gintukod kag ginpatuman sang Department of Agriculture (DA) ang

"swine program" agud hatagan kuno sang suporta pinansyal ang mga mangunguma nga may babuyan. Ginumpisahan ini antes ang eleksyon sadtong 2004.

Daku ang kahalabtanan nanday anay DA Sec. Luis "Cito" Lorenzo

kag subong DA Sec. Arthur Yap sa proyekto nga ini. Nagapungko sadto si Yap bilang administrador sang National Food Authority (NFA) kag pareho ni Lorenzo *board member* man siya sang Quedan and Rural Credit Guarantee Corp. (Quedancor), ahensya nga ginatag-iyahan sang gubyerno nga nagapatikang sa pondo sang programa nga babuyan.

Pareho sang "fertilizer scam" ni Jocelyn "Joc-joc" Bolante, sadto Undersecretary of Agriculture, ginatantya nga gingamit ang "swine program" bilang alagyan sang pondo para sa personal nga gamit ni Arroyo kag iya mga tinawo. Pero mas daku ang nakurakot nga pondo sa "swine program" kag mas direkta ini nga nakaangot kay Arroyo bangud direkta sadto nga sa idalum sang iya upisina ang Quedancor.

Sa COA Report sang 2005, ang nadula nga P1.1 bilyon kabahin sang P1.66 bilyon nga pondo nga gingasto kuno sang programa. Inisyal nga ginpondohan ang "swine program" sang P2.25 bilyon antes ini gindugangan para mangin P5 bilyon para kuno hatagan sang nagakaigo nga puhunan ang mga mangunguma nga gusto magtukod sang babuyan. Ang nabilin nga pondo sang nasambit nga programa nakadeposito sa Land Bank of the Philippines (LBP), suno sa *report*.

Wala mag-agi ang proyekto sa "public bidding." Ang mga suplayer nga nakakuha sang proyekto nagalakip sang Iloilo Feeds Corp., Nueva Foods Corp., BIRKS Agri-Livestock nga nakakuha sang P583 milyong kontrata, Silverstock (P480 milyon), ACL Corp. kag Metro Livestock (P383 milyon).

Hilmanon nga ang mga kumpanya nga ini lunsay mga "dummy corporation" nga gintukod lamang sadtong 2003, isa ka tuig antes matukod ang programa. Wala sang bastante nga kapital ang mga ini

agud dumalahan ang anuman nga dalagku nga proyekto. Nahibal-an man sa mga dokumento sini nga pulu-pareho nga mga tawo ang nakapungko sa *board of directors* sang apat nga kumpanya kag pinakapatud nga ginatag-iyahan sang pila lamang ka tawo. Wala man nakarehistro ang mga ini sa Bureau of Animal Industry. Sa mga ginpirmanhan nga kontrata sang mga kumpanya nga ini, wala sang ginahingadlan nga magapanabat kon indi mabayaran ang mga ginapautang nga pondo.

Sandig sa programa, ginhatag sang Quedancor ang pondo sa apat nga kumpanya bilang pauna nga bayad sa mga baboy nga ginpanagtag sini sa mga mangunguma. Pero sa bug-os nga panahon nga kuno nagadalagan ang programa, halos wala sang nasumite nga mga resibo, *voucher*, dokumento ukon anuman nga papeles ang Quedancor para mapaathag kon sa diin nakadto ang pondo.

Suno sa imbestigasyon sang COA, madamu sa mga mangunguma nga ginlista bilang benepisyaryo ginpapirma lang sa mga blangko nga papel kabaylo sang P200-300. Wala sila sang nabaton nga baboy ukon anuman nga pondo sa guwa sini. Subong ginahingyo sang Senado ang listahan sang mga benepisyaryo, nagpalusot ang Quedancor nga nadula sini ang nasambit nga listahan.


Sadto pa man nga 2003 may nagtuhaw nga anomalya sa pagpaguwa sang pondo sang Quedancor. Suno sa mga dokumento ginasukot sang Landbank ang Quedancor sang P300 milyon agud asikahon ang pautang kag P2 milyon bilang pangbayad sa mga

abugado (*arranger* kag *attorney's fees*). Sobra ang kadakuon sang sukot nga ini ilabi na ang transaksyon sa tunga sang duha ka ahensya sang gubyerno. Nagasto naman ang P747 milyong pondo sadtong 2004 sa panahon sang eleksyon mismo. Labi nga nagdasig ang pagpaguwa sang pondo sadtong Hulyo 2004 matapos ginpagwa ni Arroyo ang Executive Order 322 nga direktang nagpaidalum sang Quedancor sa pagpatikang sang Office of the President.

Sa disenyo pa lamang sang programa, masnahon nga alagyan lamang ini sang pondo para sa pangkaugalingon nga gamit ni Arroyo kag iya partido. Wala ini sang gintakda nga mga proseso kag garantiya para mabayaran ang mga utang. Kon indi mabayaran ang utang, igalakip na lamang ang mga ini sa mga "pautang nga wala pa mabayaran" ukon *bad debts*.

Dugang pa diri, wala sang kamatuoran nga may kakulangan sa produksyon sang baboy sadtong 2003 kon san-o natukod ang programa kag nagpagwa sang binilyun-bilyon nga pondo para diri. Suno mismo sa mga estadistika sang gubyerno, nagtaas pa gani sang 3.9% ang produksyon sang baboy sadtong 2001 pakadto 2002.

AB





Mga kadalag-an sang BHB sa Mindanao

Signipikante nga nakaamot ang mga kadalag-an sang Bag-ong Hangaway sang Banwa sa Mindanao sa sustenido nga pagsulong sang rebolusyonaryong paghimakas sa Pilipinas. Ginpahayag ini ni Jorge "Ka Oris" Madlos, tagapamaba sang National Democratic Front-Mindanao, sa okasyon sang ika-39 anibersaryo sang pagkatukod sang Partido sa Bag-ong Hangaway sang Banwa (BHB) sadtong Marso 29, 2008. Naangkon ang mga kadalag-an nga ini bangud sa suporta sang pumuluyo.

Nakalunsar ang mga yunit sang BHB sa Mindanao sang 350 taktikal nga opensiba sadtong nagligad nga tuig kumparar sa halos 300 sadtong 2006. Sining Enero tubtub Marso 2008, masobra 20 taktikal nga opensiba na ang nalunsar, suno sa pang-umpisa nga report.

Mga anihilatibo kag atritibong aksyong militar kag pila ka espesyal nga operasyon ang nalunsar sang Pulang hangaway sa isla. Masobra 300 matag-as nga kalibreng armas ang nagagaw sang BHB sa Mindanao halin sa kaaway kag mas o menos isa ka batalyon nga kaaway ang nangin kaswalti sadtong 2007 lamang. Lakip sa mga panguna-



hon nga taktikal nga opensiba sini amo ang mga reyd sa Dapecol, Sto. Tomas, Davao del Norte (masobra 100 armas); sa Cantilan, Surigao del Sur (18 armas); kag sa Lawanlawan, Las Nieves, Agusan del Norte (14)

Nakabihag ang BHB sang pila ka regular kag paramilitar nga tropa sa mga aksyong militar sini sa mga rehiyon sang Southern Mindanao, Far South Mindanao, North Central Mindanao kag North Eastern Mindanao, kag pila sa ila naglawig sang masobra isa ka bulan. Nagapasalamat ang mga POW bangud sa maayo sila nga gintrato sandig sa mga pagsulundan sang

BHB, sa CARHRIHL kag mga reglamento sang gera sa Geneva Conventions. Ang mga bihag sang gera ginhilway sa makatawo nga basehan.

Nakaugat subong ang BHB sa masobra 20 prubinsya, halos 200 banwa kag syudad kag 2,000 baryo sa Mindanao. Nadugangan sang mga erya sang operasyon sa Southern Mindanao, North Central Mindanao kag Far South Mindanao. Sa pihak sang brutal nga mga atake militar, nadugangan ang mga prenteng gerilya halin 35 sadtong 2005-2006 pakadto sa 39 sining 2008. Sining tuig, napaslawan ang AFP Eastern Mindanao Command nga waskon ang target sini nga 11 prenteng gerilya. Napaslawan man ang AFP Western Mindanao Command nga dugmukon ang target sini nga tatlo ka prenteng gerilya nga sakup sini. Nagdamu ang mga kusog-kumpanya nga prenteng gerilya samtang amat-amat naman nga nagadaku ang mayorya nga mga prenteng gerilya nga kusog-platun.

AB

Madinalag-on nga taktikal nga opensiba sang BHB

DUHA ka elemento sang 13th IB ang gilayon nga namatay sang ambuson sang mga Pulang hangaway sa idalum sang Napoleon Tumagtang Command ang ila yunit sa San Remigio, Antique sadtong Abril 4. Suno sa mga inisyal nga report, ginpalukpan sang *land mine* ang mga suldado nga nagapauli na sa ila detatsment sa Barangay Bulan-bulan sa nasambit nga banwa.

Ginsalakay naman sang mga gerilya sang BHB sa idalum sang Domingo Erlano Command ang kampo sang Bravo Company sang

69th IB sa Casiguran, Aurora sadtong Marso 24. Duha sa mga suldado ang napilasan sa lukpanay. Naglawig sang 15 minutos ang operasyon kag hilway nga nakaa-tras ang mga hangaway sa nasambit nga lugar.

Samtang, indi magnubo sa pito ang namatay kag duha ang napilasan sa separado nga pagpakig-away sang mga pwersa sang BHB sa mga elemento sang 50th IB sadtong Marso 21 kag 25 sa Barangay Tubtuba, Tubo, Abra. Tatlo ka beses nga minortar sang kaway ang lugar nga gin-awayan.

Wala sang napatay nga Pulang hangaway sa inaway nga ini kag wala sang nakuha nga armas sa ila.

Ang pag-atake sang BHB sa AFP kabahin sang suporta sini sa pagbato sang pumuluyo sang Abra sa pagsulod sang mga dumuluong nga minahan. Nagaserbi nga pwersa pangseguridad sang mga minahan nga pareho sang Olympus Pacific Mineral Inc., Abra Mining and Industrial Corporation kag Jabel Corporation ang nagkalain-lain nga yunit sang AFP.

AB



Mga tagasakdag sang tawhanong-kinamata rung, ginpasidunggan

Nagbaton sining ulihi sang pasidungog sanday Atty. Romeo Capulong kag Fr. Joe Dizon para sa ila maukod nga pagpangapin sa tawhanong-kinamatarung kag interes sang pumuluyo.

Ginpasidunggan nga "abugado sang banwa" si Atty. Romeo Capulong sang nagkalain-lain nga grupo nga nagasakdag sa tawhanong-kinamatarung, mga kapares nga abugado kag abyan para sa iya wala untat nga pagtib-ong sa interes sang imol kag mga ginapigos. Ang pagpasidungog ginlunsar sa Quezon City Sports Club sadtong Abril 3.

Si Capulong ang nagaserbi nga pangunahon nga abugado sang National Democratic Front of the Philippines (NDFP) sa pagpakignegosasyon sa gubyrno sang Pilipinas. Tampok man ang papel ni Capu-

long sa mga kaso sang mga detenido pulitikal kag iba pang biktima sang paglapas sa tawhanong-kinamatarung.

Lakip sa mga naghatag pasidungog kay Capulong amo sanday Prof. Jose Ma. Sison kag Luis Jalandoni sang NDFP, Rep. Satur Ocampo kag Teodoro Casiño sang Bayan Muna, Rep. Liza Maza sang Gabriela Women's Party kag ang anay mga kongresman nga sanday Rafael Mariano kag Joel Virador. Naghatag man sang pasidungog si National Artist Bienvenido Lumbera.

Nagtambong man didto si Rep.

Jose Yap sang Tarlac, Vice Governor Tomas Joson sang Nueva Ecija, anay Undersecretary Josie Lichauco sang Department of Transportation kag anay tagapangulo sang IBP nga si Jose Grapilon.

Sadto man nga Marso 10, ginhatag sang Tji Hak-soon Justice and Peace Foundation sang Korea ang Justice and Peace Award kay Fr. Joe Dizon kag sa Worker's Assistance Center, Inc. (WAC). Ang premyo nga ini tui-gan nga ginahatag ang sang Korean Catholic Foundation sa mga indibwal ukon organisasyon nga may signipikante nga amot sa pag-angkon sang kalinungan kag katarungan.

Ginkilala ang 12-ka tuig nga pinasahi nga pagtib-ong sang WAC sa kinamatarung kag interes sang mga mamumugon sa mga *export-processing zone* sa Cavite, sa pihak sang mabaskog nga pagpamigos.

Nagsugod ang WAC sadtong 1995 bilang programa nga "socio-pastoral". Natinguha ini nga pangapinan kag hanason ang mga mamumugon sa Cavite Export Processing Zone, ang pinakadaku nga *export-processing zone* sa Pilipinas kon sa diin ginpaluntad ang polisiya nga "no union, no strike" kag lapnagon ang pagpangtapna kag mga paglapas sa kinamatarung sang mga mamumugon.

Halin nga natukod sini nga unyon nga napasakupan sang 30 mamumugon sadtong 1997, nakabulig ang WAC sa pagtukod sang indi magnubo sa siyam pa nga mga unyon nga nagasakup sa 10,000 mamumugon sa nagkalain-lain nga mga pabrika nga ginatag-iyahan sang mga dumuluong. "Ginbuka namon ang pagpangtapna," siling ni Fr. Dizon.

Mga kaso ni Palparan, ginpausisa

GINAINSISTER sang grupong Karapatan nga imbestigahan ang mga kaso ni Maj. Gen. Jovito Palparan (ret.), isa sa pinakamasupog nga tinawo ni Arroyo kag kilala sa mga kaso sang malala nga paglapas sa tawhanong-kinamatarung kag mapintas nga pagpang-abuso militar.

Ang tikang nga ini amo ang reaksiyon sang Karapatan sa ginpagwa nga report sang Human Rights Watch (HRW) nga nagasiling nga wala pa bisan isa ka upisyal sang militar sang rehimeng Arroyo ang nakiha sa ginatus-gatos nga kaso sang pagpamatay kag linibo nga kaso sang paglapas sa tawhanong-kinamatarung. Ginasukot sang HRW ang kawad-on sang aksyon sang rehimen sa mga kaso nga ini.

Samtang, nakatalana nga hiwaton sang UN Human Rights Council sa Abril 11 sa Geneva, Switzerland ang Universal Periodic Review on the Philippines. Ginalauman diri nga magreport ang mga grupo pareho sang Karapatan bahin sa kahimtangan sang tawhanong-kinamatarung sa Pilipinas.

Nanawagan naman ang European Union sa rehimeng Arroyo nga untatan na sini ang paglista sa mga aktibista kag iban pang progresibo sa mga "order of battle" sang AFP. Ginpakamalaut man sang EU ang kawad-on sang aksyon sang rehimen sa atubang pagkadalahig sang mga upisyal militar sa mga kaso sang pagpamatay.

Kadungan sini, nagdesisyon naman ang European Union nga magpadala sang *justice assistance mission* sa Pilipinas matapos ang ginhiwat nga imbestigasyon sang Needs Assessment Mission. Sa pagtantya sini, "seryoso nga problema" ang mga kaso sang ekstrahudisyal nga pagpamatay sa Pilipinas.

AB

AB



Iligal nga pagpang-aresto kag pagpang-ipit halin Marso tubtub una nga simana

sang Abril

Iligal nga pagpang-aresto kag pagpang-ipit ang tampok sa mga paglapas sa tawhanong-kinamatarung sang rehimeng Arroyo sining nagtaliwan nga Marso tubtub Abril 3.

Abril 3. Nakabaton sang alagisod nga pagpamahug sa iya kabuhi si Redempto Ando, mamahayag sang *Philippine Daily Inquirer* nga nakabase sa Palawan. Ginadudahan sang biktima nga may kaangtanan ini sa isa ka artikulo nga ginsulat niya bahin sa kuno plano sang MacroAsia, isa ka kumpanya sang mina nga ginatag-iyahan sang negosyante nga si Lucio Tan. Ginbuyagyag niya nga ginpunggan ni Tan ang gubyrno nga ideklarar ang Mt. Mantalingahan bilang protektadong erya. Sa Mt. Matalingahan ang pinakaulihi nga kagulangan sa nabagatnan sang Palawan.

Marso 28. Ginkundenar ni Elizabeth Prinsipe, detenido nga konsultant sang National Democratic Front of the Philippines, ang rehimeng Arroyo bangud sa paggamit sini sang mga peke nga testigo agud tabunan ang mga iregularidad sang pagdukot sa iya sadtong Nobyembre 2007. Siling niya, ang mga dumukot sa iya dalagku, maskulado kag mapagsik nga lalaki kag wala sila sang upod nga babae. Indi kabahin sa mga dumukot sa iya ang paltik nga testigo nga ginpresentar sang rehimen sa Court of Appeals. Nagpasaka man sang *writ of habeas corpus* si Principe para sa iya bana nga si Leo Velasco nga gindukot sadtong Pebrero 2007 sa Cagayan de Oro City.

Marso 24. Ginapausisa sang Pamalakaya sa Commission on Human Rights ang operasyong paniktik sang AFP sa pila ka banwa sang Laguna,

ilabi na sa lugar nga malapit sa Laguna Industrial Park. Ginareklamo nila ang ginahimo nga pagpamalabay, pagpanaog sang *curfew* kag pagpanilag sa mga militanteng lider sa nasambit nga prubinsya.

Suno sa Pamalakaya, ginatunod kag ginalista sang mga sulda ang mga ngalan sang mga residente nga katapu sang Kilusang Mayo Uno, Kadamay kag iban pang organisasyon nga pilit ginaangot sang Malacañang kag AFP sa rebo-lusyonaryong hublag. Ang harasment sang militar sa mga organisasyon nga ini ginapatihan may kahilabtan sa pagbato sang nasambit nga mga grupo sa malaparan nga demolisyon sa mga komunidad nga sakup sang proyektong NorthRail.

Marso 23. Ginreklamo sang pamilya ni Muhammad Bani, 27, isa ka pari nga Muslim, ang pagtortur sang militar sa iya kag sa abyan niya nga si Al-Midzbar Bunajal, 24. Ginaresto sang ISG kag Criminal Investigation and Detection Group (CIDG) sanday Bani kag Bunajal sa isla sang Boracay sa Aklan sadtong Marso 8 kag ginaakusahan nga imbolbado sa kaso sang pagpangidnap sa Dos Palmas, Palawan sadtong 2001. Ginaakusahan man sila nga myembro sang bandido nga Abu Sayyaf.



Marso 22. Ginluthang sang gwardya sang OceanaGold Philippines Inc. si Emi-

lio Pumihic sa Didipio, Kasibu, Bayombong, Nueva Viscaya samtang ginasagup ang kaingod balay niya nga si Samuel Bidang. Nagahiwat sadto sang demolisyon ang kumpanya samtang nagakatulog si Bidang sa iya balay. Ang OceanaGold ang isa ka Australyano nga kumpanya sa pagmina nga ginhatagan sang rehimen sang kinamatarung nga magmina sa kadutaan sang Didipio. Madugay na nga ginapamatukan sang mga residente ang operasyon nga ini.

Marso 20. Iligal nga ginaresto sang gintingub nga operatibang paniktik sang Intelligence Service of the AFP kag pulisya sa Region 4A ang mag-asawa nga si Jaime Doria Soledad, 58, kag Clarita Leugo, 50, sa Camella Springville Subdivision, Molino, Bacoar, Cavite. Wala sang kapot nga mandamyento de aresto para sa magtiayon nga Soledad ang mga nagaresto nga pulis. Tatlo ka adlaw sila nga ginpa-idealum sa mabaskog nga interogasyon kag gindingutan sang kinamatarung nga makita sang mga paryente kag magkuha abugado. Kinumpirma na lamang sang militar nga kapot nila ang duha sang ginpamilit sang isa ka reporter nga nakita niya ang magtiayon sa upisina sang hepe sang paniktik sang Region 4.

Bangud wala sang ginpasaka nga kaso, napilitan ang AFP kag PNP nga buhian si Leugo pila ka adlaw matapos sila maaresto. Ginpasakaan naman sang himu-himo nga kaso si Soledad kaangot sa duha ka ambus sang Bag-ong Hanga-way sang Banwa sa Leyte sadto pa nga dekada 1990. AB

Neri, ginpaboran sang Korte Suprema

Sa boto nga 9-6, ginpaboran sang Korte Suprema sadtong Marso 25 ang apela ni anay NE-DA Secretary Romulo Neri nga pungan ang Senado nga piliton siya nga ibuyagyag ang kabilugan sang nahibal-an niya sa maanomalya nga proyektong NBN-ZTE.

Suno sa desisyon sang Korte Suprema, sakup sang "executive privilege" ang mga halambalanon sa tunga nanday Neri kag Gloria Arroyo nga nahanungod sa kuno mga "halambalanon diplomatiko". Sandig sa desisyon nga ni, indi pwede nga obligahon sang Senado si Neri nga sabton ang mga pamangkutanon kaangot diri. Nakatalana nga iapela sang Senado ang desisyon nga ini sang Korte Suprema.

Gindeklarar man sang korte nga iligal ang pagpadakup sang Senado kay Neri sa manipis nga basehan nga wala mabalhag ang mga pag-sulundan sini sa pagtigayon sang imbestigasyon-bagay nga ginahimutig sang Senado.

Gin-ulan sang pakamalaut ang desisyon sang Korte Suprema nga ginalauman pagagamiton sang mga upisyal sang gubyrno agud magbalibad nga magtambong sa mga ginahimo nga imbestigasyon sang Senado sa mga kaso sang korapsyon.

Sa iya pagpamatuk sa desisyon, ginpabutyag ni Chief Justice Reynato Puno nga indi pwede nga gamiton ang "executive privilege" agud tabunan ang mga posibleng krimen sang gubyrno.

Pat-ud nga pagagamiton nga bangdanan nanday Neri kag tanan nga iban pang upisyal sang rehimen ang desisyon nga ini agud balibaran ang pagtambong sa mga ginapatawag nga imbestigasyon sang Senado sa mga kaso sang korapsyon sa idalum sang rehimeng Arroyo.

Sa aktwal, ginbalik sang desisyon nga ini ang esensya sang EO 464 ni Gloria Arroyo nga nagadumili sa tanan nga upisyal sang gubyrno sa lebel-kabinete nga magtambong sa mga imbestigasyon sang Senado kag Kamara nga wala sang pahanugot si Arroyo. Ginbaliskad ini sang Korte Suprema sadtong 2006 nga nagdeklarar nga iligal ang mga yabi nga probisyon sang EO 464.

Ginatantya ang pinakaulihi nga botohan nga ini ang magaserbi nga salandigan sang mga desisyon sang Korte Suprema sa masunod nga mga kaso. Magalala pa ini sa maabot nga mga panahon sa tion nga magretiro ang pila ka mahistrado kag buslan ang mga ini sang mga bag-o nga nombrar ni Arroyo. AB

400 bata biktima sang militarisasyon

NAGALAB-OT sa 423 ang mga bata nga biktima sang nagalala nga mga operasyong militar sang rehimeng Arroyo halin Enero tubtub Marso 2008. Ini ang ginreport sang Children's Rehabilitation Center (CRC) sang dumdumon ang una nga anibersaryo sang pagkamatay ni Grecil Buya, isa ka siyam ka tuig nga bata nga ginpatay sang mga suldado sa Compostela Valley.

Si Grecil malapitan ng ginluthang sang militar sa isa ka inaway sadtong Marso 31, 2007. Agud tabunan ang ila krimen, ginpagwa sang AFP nga isa siya ka bata nga hangaway kag ginkuhaan siya sang retrato kaingod ang isa ka ripleng M16 nga mas mahaba pa sa iya. Ginhimutig ini sang pamilya, mga paryente kag kaingod-balay ni Grecil. Sa pihak sini inabswelto sang Commission on Human Rights ang mga kriminal.

Suno sa CRC, ang polisiya sang todo-larga nga gera sang gubyrnong Arroyo, nga mas ginahatagan tum-ok sa baylo nga mga serbisyo sosyal, pat-ud magapalala sa kahimtangan sang mga bata kag ini peligroso sa ila.

Hublag protesta sa Hong Kong, ginlunsar

Indi magnubo sa 2,000 migranteng mamumugon nga Pilipino sa Hong Kong ang naglunsar sang hublag protesta sining Marso 31 agud ipamilit ang pagtapos sa pagginahum ni Gloria Arroyo. Gindungan nila ang rali sa tatlong adlaw nga pagbisita ni Arroyo sa Hong Kong.

Ginpangunahan ang protesta sang Gloria Step Down Movement-Hong Kong chapter kag United Filipinos in Hong Kong. Siling nila, madamol ang guya ni Arroyo nga magbida sang kuno pag-uswag sa ekonomya nga sa matuod labing nagalala ang kahimtangan sang pumuluyong Pilipino, lakip na ang mga migranteng mamumugon. Nakig-isa man sa aksyong protesta ang Human Rights Commission, Justice and Peace Commission of the HK Catholic Diocese, Asia Monitor Resource Centre kag Asia Pacific Mission for Migrants.

Samtang, bilang paghiliusa sa kahublagan para sa pagpataksikon si Arroyo, ginlunsar sang mga migranteng mamumugon nga Pilipino (OCW ukon *overseas contract workers*) sadtong Abril 5 ang "zero remittance day", isa ka adlaw nga indi pagpadala sang remitans sa ila mga pamilya. Ini ang nagserbi nga regalo nila sa kaadlawan sang peke nga pangulo. Ang tikang nga ini, suno kay Maita Santiago sang Migrante, pagpahayag sang mga migrante nga sobra na ang pagpatumbaya sa ila sang subong nga rehimen. Nanawagan man sila nga magpanaog na sa pwesto si Arroyo ilabi na nga wala naman siya sang ginhimo para sa mga migrante.

Pagpaniplang sa mga mangunguma sang Sumilao, ginkastigo sang KMP

MABASKOG nga ginkastigo sang Kilusang Magbubukid ng Pilipinas (KMP) ang pagpaniplang sang rehimen Arroyo sa mga mangunguma nga taga-Sumilao, Bukidnon nga nakigbato para sa ila duta sa sulod sang madamu nga tuig. Ginapagwa subong sang rehimen, sang San Miguel Food Inc. (SMFI) kag pati sang arsobispo sang Maynila nga si Gaudencio Cardinal Rosales nga naangkon na sang mga mangunguma ang isa ka "win-win solution" (kasugtanan nga makabenepisyo ang tanan). Sandig sa kasugtanan, boluntad nga ihatag bilang donasyon sang SMFI ang 50 ektaryas sa mga mangunguma. Pero dapat nila nga bayaran ang nabilin nga 94 ek-

taryas agud makumpleto ang 144 ektaryas nga sadto pa tani dapat napagtag na sa mga mangunguma. Nagagwa nga ang mga mangunguma pa ang may kabalaslan sa SMFI.

Ang resulta sang kaso nga ini pamatuod sang pagka-inutil sang Comprehensive Agrarian Reform Program (CARP), suno pa sa KMP. Ginainto lamang sini ang mga mangunguma bangud wala sang kapat-uran nga sa ila na ang duta, lakip ang 50 ektaryas nga ginhatag kuno sang SMFI. Pagabaklon man nila sa gubyrno ang nabilin pa nga duta sa subong nga balor sini sa merkado. Pero bangud kadam-an sa imol nga mangunguma wala sang ikasarang magbayad sang bulanan

nga amortisasyon, ginalauman nga sa kaulihan mabangkarote sila kag mapwersa nga ibaligya ang ila mga duta. Sa kaso sang mga taga-Sumilao, magabalik kag magabalik ang duta sa SMFI.

Daku nga insulto kon amo ang paggamit sang rehimen sa kaso sang Sumilao-SMFI agud hatagan-rason nga palawigon ang CARP. Suno sa KMP, ang maki-asendero nga CARP ang puno kag punta sang kawad-on sang hustisya sa Sumilao. Napilitan lamang ang gubyrno nga atubangon ini bangud sa wala untat nga paghimakas sang mga mangunguma diri kag sa mala-pad nga suporta nga gin-ani sang ila pagpakigbato.


Pagtaas sang presyo sang langis, labing masunson sa idalum sang rehimen Arroyo

NAGAKATABO sa idalum sang rehimen Arroyo ang labing masunson nga pagtaas sang presyo sang langis, suno sa pagtuon sang Ibon Foundation. Gintumod sini nga halin 2001, nagtaas sang 196% ang presyo sang gas; 168% sang *diesel*, 151% sang gasolina nga *unleaded*, 150% sang regular nga gasolina kag 147% sang gasolina nga premyum. Halin sa P15 kada litro sadtong 2003, naglab-ot na sa halos P40 kada litro subong ang presyo sang *diesel*.

Kaangot sini, nanawagan ang Ibon nga gilayon nga kuhaon ang Value Added Tax (VAT) nga ginapataw sa presyo sang mga produktong petrolyo. Sadtong 2006, nagkita sang P49.15 bilyon ang gubyrno halin sa buhis sa langis nga ginapasakbat sa ordinaryo nga konsumidor.

Ginainsister man sang Ibon nga ibasura ang Republic Act 8479 ukon Downstream Oil Industry Deregulation Act sang 1998 nga amo ang naghatag sang kahilwayan sa mga dumuluong nga kumpanya nga magpataas sang presyo sang langis.

Nagasuporta sa panawagan nga ini ang mga drayber kag opereytor sang dyip. Suno sa Piston ukon Pagkakaisa ng mga Samahan ng Tsuper at Opereytor Nationwide, naghandang sila nga maglunsar sang serye sang mga aksyong protesta nga magatapos sa isa ka pungsodnon nga untat-byahe sa mga maabot nga simana.



1,000 papet nga tropang Iraqi, nag-atras sa inaway

NAG-ATRAS ang masobra 1,000 tropa sang militar kag pulis sang papet nga gubyrnong Iraqi sadtong ulihi nga simana sang Marso samtang sa kainitan sang pagpakig-away sa mga hangaway sang Shiite sa Basra, Iraq. Suno sa isa ka mataas nga upisyal sang gubyrno, lakip sa mga nagpalagyo amo ang dinosena nga mga upisyal upod ang duha ka nagapanguna nga kumand sa patag-awayan. Hungod nga naghalin sila sa away ukon basta na lamang nga nag-abandonar sang ila mga pusisyon.

Ginapakita sang mga pagpalagyo nga ini nga indi masaranggan sang mga papet nga pwersa pangseguridad nga padayunon ang ginsuguran nga gera sang US batuk sa mga pwersang mapanghilway sang Iraq.

Bunga sini, dali-dali nga gindeploy ni Prime Minister Nouri Kamal al-Maliki ang 10,000 bag-ong rekrut halin sa tribong Shiite, bagay nga ginkaakig naman sang tribong Sunni.

Sadtong 2007, naglab-ot na sa 15% sang kabilugan nga papet nga pwersang militar kag pulisya sang Iraq ang naghalin.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 7
Abril 7, 2008
www.philippinerevolution.net

Editoryal

Pasabton ang rehimeng Arroyo sa sobra nga pag-antos sang pumuluyo

Salabton sang rehimeng Arroyo ang wala kapares nga pag-antos subong sang pumuluyong Pilipino. Ang pagtimbuok sang mga presyo sang bugas, mga produkto nga langis kag iban pa nga basehang kinahanglanon nakaugat sa kontra-pumuluyo nga polisiya pang-ekonomya ni Arroyo nga masobra isa ka dekada na nagabunal sa pumuluyo.

Isa nga nagaindakal nga bulkan ang malapad nga kaakig sang pumuluyo. Ang grabe nila nga pagkawadon samtang nagapakabusog ang mga dalagku nga burukrata-kapitalista nagapabukal sa ila kaakig kag nagatulod sa ila nga pasingkion pa gid ang paghimakas para patalsikon si Arroyo.

Ila pasabton si Gloria Arroyo sa tanan nga ginabatas nga kabudlayan. Ginasukot nila siya sa pagtulod sadtong 1998 sang General Agreement on Tariffs and Trade (GATT), pagpatuman sang liberalisasyon sang ekonomya kag lubos nga pagpaidalum sang Pilipinas sa imperyalistang globalisasyon. Sa idalum sang GATT, ginbwelo sang magkasunod nga mga rehimen ang li-

beralisasyon sa agrikultura.

Ang liberalisasyon sa agrikultura, sa partikular, nagresulta sa pagdula ukon pagbuhin sang mga subsidyo sa mga mangunguma kag anupaman nga ginagmay nga suporta sang gubyerno sa agrikultura. Ginbukas sini ang pungsod sa wala kutod nga importasyon sang mga produktong agrikultural.

Ang pagdagsa sang bugas, mais, karne nga baka, baboy kag manok kag iban pa nga kapares nga produkto halin sa iban nga pungsod amo ang desaysibo nga nagkuga sa lokal nga produksyon kag sa ikasarang sang Pilipinas nga magtindog sa kaugalingon sa halambalanon sang pagkaon. Sa idalum man sang globalisasyon gintulod ang malaparan nga pagbaylo-gamit sang mga dutang agrikultural nga ginsaylo halin sa humay kag mais pakadto sa mga *cash crop* nga pang-eksport.

Ang pro-imperyalista kag kontra-pumuluyo nga GATT ang pinakadaku nga disgrasya nga nag-igo sa mga mangunguma nga Pilipino. Labi pa sa kahalitan sang pinakamabaskog nga bagyo ang pagkaguba sang



Mga tampok sa isyu nga ini...

Malala nga krisis sa bugas
PAHINA 2

Korapsyon sa programa sa babuyan
PAHINA 4

Mga kadalag-an sg BHB sa Mindanao
PAHINA 6

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*